

πi
2905



QK. 209, 17

II i
2905

Ein Sermon auff
die Kirchweihe / vber das Euangeli-
um von Zacheo Luce 19. Darinnen gehandelt
werden/alle Drey NOTIGE stücke der
rechten Christlichen Busse/Ge-
prediget durch

Georgium Buchholzerum
Probst zu Berlin.

Zu ehren der löblichen vnd Chur-
fürstlichen Stad Prenzlau in der
Bekermarck in Druck ver-
fertigt.

Wittenberg.

Gedruckt durch Lorenz
Schwenck.

1562.

BIBLIOTHECA
PONICKAVIANA

UNIVERSITÄTS-BIBLIOTHEK
HALLE
(SAALE)

111

392. A2

EPIGRAMMA DO-
CTORIS GEORGII SABINI IN
insignia D. Georgij Bucholzeri
Præpositi Berlinensis.



Maiorum sunt hæc insignia clara meorum,
Quæ ualida quondam promeruerunt manu:
Tertius imperij quando Fridericus habenas,
Terrarumq; potens orbis habebat opes.
Hæc eadem, quoniam cœlestia dogmata pando,
Condecorant munus non sine laude meum.
Namq; lupos ueluti latrantes ore molossi
Propellunt, pauide ne lacerentur oues:
Sic propello, quibus doctrina est impia cordi
Acer, & ore tuum protego Christe gregem.

Den Erbaren/ Er=
samen vnd Wolweisen/ Burgermei=
stern / Rathmannen / vnd gantzer Gemei=
ne der Churfürstlichen Stadt Prenzlaw
in der Bekermarcke/meinen gros=
günstigen Herrn vnd
guten Freunden.

Gottes gnade vnd friede/
durch vnsern Herren Ihesum
Christum/Gottes vnd der rei=
nen Jungfrauen Marien
Son / Amen. Erbare/Ersa=
me vnd Wolweise/ Grosgün=
stige lieben Herren vnd Freunde/Nach dem
ich einen Sermon von der Kirchweihe ge=
than / vnd hernach auffß Pappier gebracht/
vnd den/ dem Erbarn vnd Wolweisen Herrn
Mattheo Bierthenheim/Ewrem Burgermei=
ster/ meinem Grosgünstigen Herrn/welcher
ein sonderlicher liebhaber aller Gelerten/vnd
aller guter Künste/vnd von Gott mit grossen
gnaden begabet ist / vberlesen lassen / hat
derselb im sehr wolgefallen / vnd sagte/ Die=
weil darinne auff das kürzste verfasst were/

A 2 Die

die Summa der ganken Christlichen Lere/
were er werd/ das derselbige gedruckt würde/
sonderlich zu dieser zeit/ da etliche lere/ Gu-
te Werck seien nicht nötig/sondern frey. Item
sein schedlich zur seligkeit. Item/das mus vnd
sol / ist versalken vnd verbrandt. Dieweil
ich denn noch ingedenck bin/ das Anno 1548.
Ewer E. W. Predicanten in der Stad/ eine
solche Christliche / Schriftliche antwort/
dem Durchleuchtigsten vnd Hochgebornen
Fürsten vnd Herrn/Herrn Joachim Marg-
grauen/ zu Brandenburg vnd Churfürsten
etc. meinem gnedigsten Herrn/von wegen des
INTERIMS, zuschicketen/ die Irer G. F.
G. so wol gefiel / das Ire G. F. G. bewogen
worden/dieselbige der Kaiserlichen Maiestet
zu senden / Denn Gott lob vnd danck/ Ewer
Stad allezeit der reinen Lere Ihesu Christi
zugethan gewesen / vnd darzu nicht wenig
geholfen hat / der alte Erbar vnd Wolweise
Herr Matthias Kalb / ewer Bürgermei-
ster / vnd dieweil denn der Aechtbar/Erbar/
vnd wolgelerte Herr / Magister Henricus
Zago auch ewer Mitbürger worden / der
nicht eine geringe zier Ewer Stad Prenk-
law ist/welche allezeit meine besondere freun-
de gewesen

de gewesen sein. Bin derhalben bewogen
worden/diese Predigt in Druck zu geben/und
E. E. W. zu dediciren/damit E. E. W. sehen
mögen/was mein Lehr ist / die ich nu 23. jar
hie zu Berlin geleret habe/ vnd durch Gottes
hülffe / bis an mein ende leren wil/ Bitte E.
E. W. wöllen die von mir / als ein geringe
verehrung annemen / vnd was ich E. E. W.
als meinen Herren zu dienen weis/bin ich be-
reit vnd willig / vnd bitte auch von hertzen/
das Gott der Vater vnsers Herrn Ihesu
Christi E. E. W. durch den heiligen Geist/
wölle erhalten / das jr in der reinen Lere
Christi/ bis ans ende bestendig bleibet/Denn
Christus spricht Matth. am 24. Wer behar-
ret bis ans ende / der wird selig / vnd wolt
Euch ja Ewer Christliche Predicanten las-
sen befohlen sein/das gebe Gott/Amen. Da-
tum Montags nach Visitationis Marie/
Anno 1562.

E. E. W.

williger

Georgius Buchholzer
Probst zu Berlin.

Das Euangelium

vom Zacheo / Luce 19. geprediget vnd
ausgeleget auff die Kirchweih / durch
Georgium Buchholzerum Probst
zu Berlin.



Und er zoge hinein / vnd gieng
durch Jericho / vnd sihe da war
ein Man genant Zacheus / der
war ein oberster der Zölner /
vnd war reich / vnd begeret Ihesum zu sehen
wer er were / vnd kund nicht vor dem Volcke /
denn er war klein von Person. Vnd er lieff
vorhin / vnd steig auff ein Maulberbaum /
auff das er in sehe / denn alda solt er durch
komen. Vnd als Ihesus kam an dieselbige
Stad / sahe er auff vnd ward sein gewar / vnd
sprach zu im / Zachee / steig eilends hernider /
denn ich mus heute zu deinem Haus einke-
ren. Vnd er stiege eilend hernider / vnd nam
in auff mit freuden. Da sie das sahen / mur-
reten sie alle / das er bey einem Sünder einke-
rete.

Zacheus aber tratt dar / vnd sprach zu
dem HErrn / Sihe HErr / die helffte meiner
Güter

Güter/gebe ich den armen/ Vnd so ich jemand
betrogen habe / das gib ich vierfeltig wider.
Ihesus aber sprach zu im / Heute ist deinem
Hause heil widerfahren / sintemal er auch A-
brahams Son ist/ Denn des Menschen Son
ist komen zu suchen / vnd selig zu machen/ das
verloren ist.



Lieben Freunde / nach dem wir
heute die Kirchweih / oder Kirch-
messe halten/ da dieses Gotteshaus
am ersten Gott ist zugeweiht wor-
den/ das man sein Wort lauter vnd
klar / darinne predigen sol/ vnd die
Sacrament vnsers D^{er}ren Ihesu Christi/ nach
seiner einsetzung reichen / vnd da zusamen ko-
men / zu beten / vnd den Namen vnsers D^{er}ren
Ihesu Christi Gottes Sons / anzuruffen / dan-
cken/ loben vnd preisen/ So wollen wir am ersten
sagen/ von viererley Kirchweih oder Kirchmes-
se / damit wir auch wissen / wo die her kompt.
Denn mancher schreiet / vrteilt vnd schendet die
alten Fest der Kirchen / vnd weis keinen grund/
warumb? Vnd were besser/ er gieng in die Kirche/
betet ein Vater vnsere dar für. Darnach wollen wir
das Euangelium vom Zacheo hören / mit t. östli-
cher zuuersicht / werden wir es im hertzen so anne-
men / so sol es one grosse mechtige frucht vnd
nutzbarkeit / vnsers Leibs vnd der Seelen / nicht
abgehen. Wollen nu das erste teil hören.

Die

Die erste Kirchweihung oder Kirchmefs/
wie wirs Deudschen heissen / ist gehalten
von Salomon dem Könige / nach der Welt
anfang 2933. Jar / vnd vor der geburt Christi /
im 1037. Jar / da er den Tempel gebawet hat. Da
versamlet Salomon zu sich die Eltesten in Israel /
im siebenden Monde Ethanim / das ist / im Octo-
bri / im Weinmonde / zween tage nach Michae-
lis / vnd brachten die Lade Gottes in Tempel / vnd
weiheten den Tempel. Da betet Salomon von
hertzen zu Gott / vnd hielt vierzehen tag Kirch-
weihe / vnd opffert zwey vnd zweintzig tausent
Ochsen / vnd hundert vnd zweintzig tausent
Schaf / Wie man denn 3. Reg. 8. lesen mag.

Die ander Kirchweihe ist gehalten wor-
den / zur zeit Judæ Machabei / 5. Jar darnach / als
Antiochus Epiphanes der edele / der Tyran / den
Tempel verwüstet / den Altar entheiliget / die Pfor-
ten verbrandt / vnd der Platz vmbher mit Grase
bewachsen war / wie ein Wald oder Gebirge / da
reinigete vnd weihete Judas Machabeus mit den
Priestern des Tempels / das Heiligthumb vnd
den Altar wider / vnd opfferten widerumb nach
dem Gesetz mit grossen freuden / vnd verordenten /
das man alle Jhar zum gedechtnis / den 25. tag
des Mondes Casleu / das ist / den 25. tag De-
cembris / im Christmonde / eben itzt bey vns Chri-
sten / am Christage / acht tage lang feiren musten /
zu welcher Kirchweihe auch Christus vnser
Herr selber gangen ist / Johannis am 10. Vnd
ist ausgesetzt vmb das Jar vor Christi geburt /

157. / Wie i. Machabeorum 4. geschrieben stehet.

Die dritte Kirchweihe der Christen / ist geschehen zur zeit der lieben Peter / nach dem nu die Christenheit zunam. Denn vorhin zur zeit der Juden / war nur ein einiger Tempel zu Jerusalem / da sie mussten dreymal des jars dahin kommen / als auff Ostern / Pfingsten / vnd der Laubhütten fest / vnd da opffern Exo. 23. Darnach hatten sie in allen Stedten vnd Dörffern Synagogen / da sie Gottes Wort höreten vnd lereten / Aber opffern mussten sie nirgent / denn zu Jerusalem / Deut. 12.

Vnd die Christenheit hat am ersten auch nicht eigene Tempel gehabt / denn die Aposteln predigten auff den Marckten / vnd auff den Dechern / in den Heusern / da das Volck zusammen kam / wie Christus spricht / Matth. 10. Aber da der Christen die menge ward / baueten sie eigene Kirchen vnd Tempel / als S. Clemens in decimo libro recognitionum in fine schreibet / das ein Christ mit namen Theophilus / der oberste in der Stadt Antiochia / sein eigen Haus gegeben hat / das man eine schöne Kirche daraus gebawet / vnd S. Petro einen Predigstuel darinne gemacht hat / wenn das Volck zusammen komen / zu hören Gottes wort / so hat er jnen daselbs geprediget.

Darnach da Gott weiter gnade gab / das das Euangelium vberal geprediget ward in den Stedten / da baueten sie allenthalben Kirchen / vnd vertrieben der Abgötter Tempel. Wenn nu die
B Christen

Christen horeten / in den andern Stedten / das
Gott sein Reich gemehret hatte / vnd nu abermals
in der Stadt / Christo zu ehren / einen Tempel ge-
bawet hatten / iren Ehrenkönig Christum zu lo-
ben / da wurden sie so fro / vnd kamen aus andern
Stedten von viel meilen zusammen / wenn man zum
erstenmal die Kirche solte weihen / vnd darinne
Gottes Wort leren / vnd die Sacrament Christi
reichen / da ward ein solch frolocken vnd dan-
cken zu Gott / das vber aus war. Wie denn Euse-
bius in Historia Ecclesiastica / im neunnden Buch
am 10. cap schreibet / nach Christi Geburt / zur zeit
Maximini des Keisers / vmb das jar 239. vnd die-
ses sind die Wort Eusebij.

In des haben die vnsern / so Christen wa-
ren / viel hohe herrliche fest / auch die Kirchwei-
hung / durch Stedte vnd Lender / mit grosser freu-
de vnd frolockung gehalten vnd gefeiret. Es ka-
men zusammen die Priester / vnd da war niemand
faul oder vberdrüssig / auch von ferne zu komen /
dieweil die liebe nicht lange verzeuhet oder weile
nimpt. Denn die Leute oder Völcker lieffen zusa-
men / als rechte glieder eines leibes Christi / vnd
war jnen eine grosse freude / das sie zusammen ka-
men / also / das in jnen wol hette mügen erfüllet
werden / die figurliche vnd Prophetische rede / die
als ein geheimnis oder bedeutung ist gesagt wor-
den. Es wird sich versamlen ein bein zum an-
dern / ein glied zum andern / vnd wird sein ein
Geist / eine Seele / Dieweil in allen ein glaub / ein
Gott /

Gott / vnd sie alle aus einem munde Gott den Herren ehren / vnd mit guten Lobgesungen / loben vnd preisen.

Vnd vnter den Priestern vnd Dienern / vnd in allen dingen / so zum Göttlichen leben gehörten / sahe man besondere grosse gnade.

Wie stunden die Chöre oder versammlung der jungen vnd alten / Jungfrauen vnd Frauen / die Christliche Psalmen sungen / vnd den Namen des Herrn lobeten. Die wurden die dienstbarkeiten des geheimnis / mit guter ordnung vnd unterschied gehalten / Denn da sassen die Bischoue vnd Pfarherrn / als alte / Ehrwürdige / ehrliche / grauehaupte Menner anzusehē / Vnd so es einem durch Gottes gnade / ins hertze ward gegeben / stund er auff / that dem Volck eine Predigt / da hörten sie alle mit grosser stille vnd vleis zu / vnd sahen in mit iren augen vnd munde gar eben an / vnd erwarteten der Himlischen lere / die er inen an Gottes stat predigen würde. Eine solche zucht war in den Zuhörern / eine solche ordnung ward vnter den Priestern gehalten. Itzund prediget der / itzund ein ander / nicht alleine zwen oder drey / wie der Apostel sagt / sondern welchem etwas gegeben ward / der that seinen mund auff vnd lerete / wie etwan auch Moses sagt / Wolt Gott / das alle das Volck des HERRN weissagete / da war weder neid noch hass / sondern nach dem ein jeder / die gaben Gottes empfangen hatte / brauchten sie die / wie geschrieben stehet / zur besserung / vnd das alles in der liebe / in der sie gegeneinander / mit aller ehrerbietung /

B ij bietung /

bietung / das einer den anderen ja höher hielt / le-
beten. Wer da wil / mag weiter Eusebium hienon
lesen. Das ist warlich eine schöne / herrliche / lieb-
liche / fröliche / vnd Brüderliche Kirchweih ge-
wesen / Wolte Gott / das es bey vns Christen itzt
auch also gehalten würde / so solte es viel besser in
der Christenheit zugehen / denn es gehet.

Die vierde Kirchweih geschach nu her-
nach / do das Papstumb angieng / vnd die gros-
sen Bischoffthumb auffkamen / da lies mans
nicht dabey bleiben / bey der Kirchweih der lie-
ben Peter / wie zur zeit der ersten Kirchen ge-
schach / da sie die Kirchen vnd Tempel einweih-
ten / mit predigen / beten / Sacrament reichen /
Gott loben vnd dancken / Sondern brauchen son-
derliche Ceremonien darzu / wenn sie die Kirchen
wolten weihen / vnd gieng also zu: Zum ersten /
gieng der Bischoff an die Thür der Kirchen / sties
mit dem stabe dran / vnd sprach / Attollite portas
Principes uestras, & introibit rex gloriae. Das ist / Ir
Fürsten / macht die Thore oder die Thüren weit
auff / das der König der Ehren einziehe. Darnach
gieng er in die Kirche / vnd machet von asche vnd
sandt ein Creutze / vnd schreib darein das Grie-
chische vnd Latineische alphabet / vnd nicht He-
breisch / zu bedeuten / das die Juden abgefallen
sein / vnd alleine die Heiden geblieben / die das
newe Testament / von dem gecreutzigten Ihesu
Christo / das Griechisch geschrieben ist / angeno-
men haben.

Darnach hat der Bischoff zwelff Creutze
gemacht / an den Wenden der Kirchen / darauff
zwelff

zwelff Liechter brandten / zu bedeuten / das nur in diesem Tempel / das wort der zwelff Aposteln / von dem gecrentzigeten Christo / leuchten / das ist / geprediget werden sol / Alle andere Lere / sol nicht gelten in diesem Hause / welchs warlich ein gute bedeutung ist.

Als hat auch bedeut / das man vier Fensterlein / darauff die aufferstehung Christi gemalet war / auff den Kirchthurm ausstecket / das dieses Haus oder Tempel Ihesu Christi / des Ehrnkönigs sein sol / der mit dem Tod vnd Teuffeln in der Hellen gekempffet / den sieg vnd das feld behalten hat / welchen sieg vnd streit / die vier Euangeliben beschreiben.

Das wort vom leiden / sterben / aufferstehung / vnd Himelfart des Herrn Christi / Gottes Sons / sol alleine in diesem Hause geleret vnd geprediget werden / vnd nicht Menschliche lere / wie im Papstumb geschehen ist. Denn also singet die alte Kirche im Responsorio von der Kirchweihe / das billich nicht vergessen solt werden / welchs heist:

Benedic Domine domum istam, & omnes habitantes in illa, sitq; in ea sanitas, scilicet, syncerae ac purae doctrinae Christi, ut loquitur S. Paulus 1. Timoth. 1. & 6. & ad Titum 1. & 2. humilitas, sanctitas, castitas, uirtus, uictoria, fides, spes, & charitas, benignitas, temperantia, patientia, spiritualis disciplina & obedientia per infinita saecula. Vers. Conserua Domine in ea timentes te, pusillos cum maioribus. Ist das nicht Christlich / Köstlich / lieblich / vnd wol gesungen / Wie köndt man es doch besser maehen? Wolte Gott / man were dem im

B ij

Papstumb

Bapstumb also nachkomen / Aber man hat das widerspiel gethan / vñ das wort der Aposteln / vnd des Creutzes Christi Ihesu / faren lassen / vnd des Teuffels lere / vnd des Bapsts dreck / an die stat gelernt / vnd were nicht wunder / das sich die Papi- sten schemeten / wenn sie die zwelff Creutze / auff ire Kirchmesse / mit Liechten / oder die Fenlein auff der Kirchen / ausgestecket / ansehen / das sie irer Kirchweihe nicht nachgefolget / sondern offentlich darwider / mit leren vnd predigen / gehandelt vnd gethan haben.

ES schreibet S. Gregorius im Dialogo / lib. 3. cap. 30. Das zu Rom eine Kirche der Arria- ner / die Christum verleugnetē / das er nicht warer Gott / von ewigkeit were / sey wüste gestanden / da man die Christo / als dem waren rechten Gott / widerumb mit Gebete geweihet vnd zugeeignet hat / da ist der Teuffel / wie eine grosse Saw zwis- schen den Leuten aus der Kirchen gelauffen / das ich glenbe / das noch viel fromer Bischoue gewe- sen / die da hertzlich zu irem D^{er}rn Christo gebe- tet haben / vnd solche Teuffel vertrieben vnd veria- get haben / mit irem Gebete zu Christo vnserm D^{er}rn. Aber hernach / als der rechte Teuffelsge- schmeis der Mönche auffkomen / da ist die herrli- che Kirchweihe oder Kirchmesse der lieben Peter vnd Bischoue / alle vergessen worden / vnd aus der Kirchweihe oder Kirchmesse / ein Ablaskram / oder ein Jarmarckt draus gemacht / da viel hun- dert tausent Jar Abblas verkauft worden / da ist man hingelauffen / mit hauffen / Vnd wo Duren vnd Buben nirgend kondten zusammen komen / da kamen

amen sie auff die Kirchmes zusammen / vnd frassen / soffen / vnd war darnach / wenn sie voll worden / ein solch hawen / schlagen vnd morden / das es besser gewesen were / das sie keine Kirchweihe oder Kirchmes nicht gehalten hetten.

Nach dem aber / Gott lob vnd danck / solcher missbrauch bey vns gefallen ist / so halten wir / das fest der Kirchwelhe / welchs an jm selbs nicht böse ist / Vnd wollen Gott dancken vnd loben / das er in dieser Stad / jm auch eine Kirche gesamlet hat / vnd bitten / er wolte von wegen seines Sons Ihesu Christi / die erhalten / desgleichen an andern örten auch / vnd zerstören des Teufels / des Paps / der newen Libertiner / Antinomier / des Türcken / vnd der Jüden Kirche / vnd seine gnade verleihen / das in diesem Tempel oder Kirche / das reine wort Gottes / der zwelff Aposteln / von dem gecreuzigtē Christo / alleine möchte geleret vnd geprediget werden / vnd Gott wolle vns fur aller anderer Lere / gnediglich behüten vnd bewaren / das sol vnser Kirchmes sein / die wir halten wollen / Vnd das habe ich euch erstmals von der Kirchweihe wollen sagen / vnd wollen nu zum andern stücke des Euangelij auch greiffen.

II.

In diesem Euangelio / höret man / das der heilige Lucas der Euangelist / lust gehabt / diese Historien vom Zacheo zu beschreiben / Denn er beschreibet vns die so vleissig / das er nicht

nicht alleine saget / wie Zachens reich gewesen /
vnd was er fur ein handel getrieben / sondern auch
wie er eine kleine Person gewesen / wie er auff den
Maulbeerbaum steigt / vnd wie er von Christo
gefordert wird vom Baum zusteigen / gehet in
Zachens Haus / leret vnd prediget daselbst / das
wenn man gleich nicht Kirchweih hielte / so
were doch dieses Euangelium werd / das man ei-
nen sonderlichen tag feierte / daran es geprediget
würde / Vnd ich halte vnd glaube / das die lieben
heiligen Peter / es derwegen auff die Kirchmes /
zu predigen verordnet haben. Denn auff die zeit /
viel Leute zusammen kamen / Vnd dieses Euangeli-
um leret die Summa des gantzen Christlichen le-
bens oder Bussse / das sie es möchten behalten vnd
lernen / vnd dem Exempel des lieben Zachai nach-
folgen / vnd auch so Bussse thun / vnd sich besseren.
Nu wollen wir am ersten hören / was Zachens fur
einen handel getrieben hat.

Erstlich schreibet der liebe Lucas / das er ein
oberster Zölner gewesen ist / der den Keiserlichen
Tribut / den die Jüden jerlichen / dem Keiser zu
Rom gaben / von den Römern erkauft hatte / vnd
ein genant Gelt darumb geben / darnach die arme
Leute auff das höchste geschunden / wie die Ampt
leute pflegen zuthun / die den Fürsten vnd Herrn /
Gelt auff die Empter leihen. Nu ist er nicht ein
schlechter Zölner gewesen / sondern ein oberster der
andern Zölner / der den andern die Empter wider
verkauft hat / vnd offtmals wird zu inen gesagt
haben / Wenn man sie mit der Hauptsumma oder
Kauff-

Kauffgelde vberfetzt / das sie es nicht wol so hoch können erschwingen. Lieben Gefellen / solt ir geben / so nemet es wider von denen / die euch Zoll sollen geben / Wie denn ein grosser Rath eines Fürsten gesagt hatte: Je mehr man die Weiden beherwet / je besser vnd grösser sie wachsen. Also auch / Je mehr man die Bawren vnd Bürger beziehet vnd schatzet / je mehr sie zunemen / Denn so müssen sie arbeiten / sonst gehen sie zum Bier / vnd wollen nichts thun. Ein solcher Geselle ist Zacheus auch gewesen / wie ers denn bekennet / Dabe ich jemand betrogen / so wil ichs vierfachtig widergeben / das ist eins von Zachei handel.

Im andern ist Zacheus reich gewesen / das ist / der seinen trost / auff sein Reichthumb gesetzt hat. Denn Reichthumb ist an im selber nicht böse / aber das hertze darauff zusetzen / ist böse. Denn Abraham / David / Salomon / vnd Job / sein auch alle reich gewesen / haben aber ir hertz nicht darauff gesetzt / Wie der 61. Psalm sagt / Diuitia si affluent, nolite cor apponere. Denn wenn das hertze dran hengeret / so ist reichthumb ein Abgott / Darumb ist das reichthumb Zachei Abgott auch gewesen / der in seinem hertzen gedacht / Gott im Himel bleibe wo er wolle / so halte ich mich an den Gott / den ich im Kasten habe / das ist das ander stücke / was Zacheus gewesen ist.

Im dritten / wie wird Zacheus bekeret? Also. Er wird on zweivel zu den andern Zölnern gekommen sein / die durch den HErrn Christum bekeret worden / Wie Matthei am 9. geschrieben stehet /

C het /

het / die wird er gefragt haben / Was doch Chri-
stus der newe Prophet lere? die werden zu im ge-
saget haben: Zum ersten lere er die zehen Gebot /
wie grosse Sünde es sey / den Nächstten betriegen /
vnd vbersetzen / Denn es ist wider das siebende
Gebot / Du solt nicht stelen / die Sünde wird Gott
mit Dellischem feuer straffen / 1. Thessa. 4. Dar-
nach das hertz auff das reichthumb setzen / ist eine
Sünde wider das erste Gebot / Denn es ist grosse
Abgötterey / die Gott allezeit greulich gestrafft.
hat. Aber den armen Sündern / die Busse thun
vnd abstehen von Sünden / vnd an in glauben / de-
nen vergebe der newe Prophet Ihesus von Naza-
reth die Sünde.

Da das Zachens höret / beginnet im das
hertz weich zu werden / vnd vber zu lauffen / vnd
dencket: O wehe / wo bleibe ich nu / In den Sün-
den bin ich nu lange zeit gesteckt / O möchte mir
geholfen werden / das ich vergebung der Sünden
erlangete / ich wolte ein ander Mensch werden /
abstehen vnd ablassen von Sünden. Aber ich bin
zu ein grosser Sünder / ich fürchte. der newe Pro-
phet von Nazareth / wird mich nicht annemen /
doch möchte ich den gerne sehen / wer er were / vnd
nach dem er klein von Person war / das er in vnter
dem Volck nicht kond sehen / steigt er auff einen
Maulberbaum / das er in möcht sehen. Das ist nu
das erste stücke der Busse / das da heist / Kew vnd
leid haben / vber die Sünde / von wegen Gottes
zorns / vnd das kompt aus der Predigt des Gese-
tzes / oder der zehē Gebot / Wie S Paulus spricht /
Roma. 3. Cognitio peccati ex Lege. Et Roma. 4. Lex
iram

iram operatur. Erkenntnis der sünde ist durchs Gesetz. Item das Gesetz wircket zorn.

Das ander stücke der Busse. Wie wird im geholffen? Nemlich also. Nach dem im das hertze pucht/were gerne der Sünden los/vnd weis doch nicht/wie er darzu komen sol/sitzet auff dem Maulberbaum/sihet sich nach dem DERN Christu vmb / Vnd wie der DERN Christus zu dem Baum kompt/sihet er auffwärts / vnd wird sein gewar / vnd spricht zu im / Zachee / Zachee / steig eilend ernider / den ich mus heute zu deinem Hause einkeren. Da höret jr / wie Zacheo geholffen wird / Denn erstlich ist das Desiderium uidendi Iesum da, das er den DERN Ihesum zusehen begeret. Wenn es darzu kompt / das das hertze saget / Ah wie gerne wolte ich doch / das mir mochte geholffen werden / vergebung der Sünden von Gott durch Christum erlangen / Wenn das da ist / so ist Gottes hülffe nicht weit / Wie der 6. Psal. saget / Desiderium pauperum exaudiuit Dominus. Das seufftzen der armen erhöret der DERN. Denn das ist clamor Spiritus sancti in cordibus piorū, Das ruffen des heiligen Geistes in der Gottfürchtigen hertzen. Roma. 8. Abba pater, Ah lieber Vater hilff doch / wie wir im Zacheo auch hören / Er begert nur schlecht Christum zusehen / da kumpt Christus / ruffet in / er sol herab steigen / Er wolle heute sein Gast sein.

Wo kompt nu die seligkeit Zachei her? Per uerbum uocale, das in Christus ruffet / das heißet wie Paulus saget / Roma. 10. Fides ex auditu, auditus per uerbum Dei. Das ist / der Glaube kompt aus

der predigt / das predigen aber durch das wort Gottes. Welches alles ist wider die Teuffelische Stenckfeldische Sect / die das mündliche wort Gottes / oder Predigamt verachtet.

Da Zacheus das wort Christi höret / er sol herab steigen / da macht er nicht lange zu / steigt herab / vnd nimpt den Gast an mit freunden / vnd füret in in sein Haus. Warlich da wird der Herr Christus eine schöne herrliche Predigt gethan haben in Zacheus hause / in vnd seinem ganzen Hausgesinde / vnd ist schade das man die nicht haben sol / Doch können wir dencken / was es wird für eine Predigt gewesen sein / aus des Herrn Christi Worten / die er zu den Pharisæern saget / Venit enim Filius hominis, quærere & saluum facere, quod perierat. Denn des Menschen Son ist komen zu suchen / vnd selig zu machen das verlorn ist / Welches die alten Patres also kurtz ausgelegt haben / Venit, scilicet, de cœlo: in mundum, per humanitatis assumptionem: Quærere, per doctrinam suam: saluum facere, per gratiam: quod perierat, per culpam, Er ist komen vom Himel: in die Welt / durch seine menschwerdung: zu suchen / durch seine lehr: vnd selig zu machen / durch seine gnade: das verlorn war / durch vnser schult / ist sehr wol gedeutet / das wird die gantze Predigt gewesen sein. Erstlich was Christus für eine Person ist / vnd was sein Ampt ist / vnd was er thun wil.

Was Christus für ein Person ist / nemlich / er ist komen vom Himel / aus dem schoß seines ewigen Vaters / als der warhafftige Gottes Son / vnd ein Mensch: oder wie Johannes sagt am j. cap. Fleisch worden /

worden/ Vnd wie die Christliche Kirche singet: Qui
descendit de coelis propter nos homines, & propter nos-
tram salutem, & incarnatus est de Spiritu sancto, ex Ma-
ria uirgine, & Homo factus est. Da habet jr beides/
die Person / das er ist zu gleich warer Gott vnd
Mensch / Vnd sein Ampt / was er thun wil / Qua-
rere per uerbum & doctrinam. Denn da ruffet er vnd
leret erstmals Zacheum / darnach da er der Lere
Christi gienbet / darumb er Abrahams rechtes
Kind genant wird / Galat. 3. Die des glaubens
sind / das sind Abrahams Kinder. So wird Za-
cheus selig aus gnaden / vnd nicht aus verdienst /
sonst würde Gnade nicht Gnade sein / Roma. 11.
Vnd wie Christus spricht: Hodie salus huic domui
facta est. Heute ist diesem Hause heil widerfahren.
Das ist / er erlangete vergebung der Sünden. Den
saluari heist vergebung der Sünden haben / Wie
der Engel sagt Matth. 1. Saluum faciet populum su-
um à peccatis eorum. Er wird sein Volck selig ma-
chen von iren Sünden. Vnd Christus spricht Lu-
ce 7. Vade fides tua saluam te fecit. Gehe hin mit frie-
den / dein Glaube hat dich selig gemacht. Quem
Christus hic saluum facit? Zacheum, qui perierat per
culpam & peccatum, Der seiner Sünd halben des
Teuffels war / der mus itzt Gottes Kind werden /
der erlanget vergebung der Sünden / leben vnd se-
ligkeit / das Himelreich vnd alle Gottes gnade /
Das ist nu das ander stück der Bussse / wie Zache-
us wider zu rechte kumpt / als / das er alleine ver-
gebung der Sünden / durch den Glauben an Jhe-
sum Christum / aus lauter gnade / on allen ver-
dienst / erlanget.

C iij Zum

Zum dritten / Was thut nu Zacheus / nach dem er Busse gethan vnd vergebung der Sünde erlanget hat / Bleibet er der alte Zacheus? trawen nein / sondern er wird ein ander / vnd ein newer Zacheus / der vormals ein solcher Geitzhals war / der nur allwege saget / Rips Raps in meinen sack / ein ander habe was er mag / Der ist nu ein newer Mensch / vnd spricht zu dem HErrn Christo / Siehe HErrre / die helffte meiner Güter gebe ich den armen / vnd so ich jemand betrogen habe / so gebe ichs vierfeltig wider. Denn im Gesetz Mosesi war geboten / Exod. 22. Wenn einer ein Schaf stal / musste er vier Schaf / für das eine Schaf geben / das erbeut sich Zacheus auch zuthun / vnd das sein zwō rechtschaffene fruchte der Busse / die nötig sein / von wegen Gottes gebots / die man mus thun / erstlich arbeiten / vnd den Armen geben / Ephe. 4. Darnach erwuchert / vnrecht / böse / geraubet vnd gestolen Gut / wider geben / Wie Ezechiel der Prophet am 33. sagt: Impius si rapinam non restituerit, uita non uiuet, sed morietur. Das ist / so der Gottlose das geraubte nicht wider gibt / so sol er sterben / vnd nicht leben. Vnd S. Augustinus spricht ad Macedonium Episto. 5 4. Si res aliena, propter quam peccatum est, cum reddi possit, non rededitur, non agitur poenitentia, sed fingitur. Si autem ueraciter agitur, non remittetur peccatum, nisi restituatur ablatum, sed, ut dixi, cum restitui potest / Wenn man ein frembd gut / daran man sich versündiget hat / nicht wider gibt / so fern mans wider geben kan / so thut man kein rechte busse / sondern ist nur ein schein / Wenn man aber warhafftig handelt / so wird die sünde

sünde nicht vergeben / wo man das entfrembdte
gut nicht wider gibt / so fern mans wider zu geben
vermag. Nicht das die restitutio bonorum verge-
bung der Sünden brenge / sondern ist signum uerae
poenitentiae / ein gewis vnd warhafftiges zeichen /
das die Leute recht Busse thun.

Gleich wie einer / der einem andern sein Weib
entfüret / der ist nicht ein Ehebrecher alleine Rapi-
endo / das er dem sein Weib nimpt vnd wegfüret /
sed etiam retinendo / so lange er das Weib bey sich
behelt. Vnd wenn nu der wolt sagen / es wer im
leid / das er seinem Nechsten sein Weib entfüret /
vnd wolte doch gleichwol das Weib bey sich be-
halten / vnd dem Manne nicht wider geben / der
büffet nicht recht / Denn wenn er büffete aus her-
tzen grund / so würde er sagen zum Weibe: O wehe
mir / wie vnrecht hab ich gethan / das ich dich dei-
nem Manne entfüret hab / gehe wider hin / Bitte
vnd flehe / das er dirs vnd mirs vergebe / Denn ich
wil dich nicht lenger haben / sonst sein wir beide
verdammnet / vnd ewig verloren / das heisset recht
Büssen. Also gehet es mit geraubetem Gute auch
zu / dieweil du es beheltest / gibest das nicht wi-
der / kanstu keine Busse thun. Darumb wiltu
recht Busse thun / mustu es wider geben / dem es
gehöret / wie Gott geboten hat.

Möchtestu aber sagen / Ja wie wenn es weg-
were / oder einer so arm were / das ers nicht geben
kan / wie thut man im denn? Antwort. Das ist ein
anders / wenn mans nicht haben kan oder hat /
oder des vermögens nicht ist zu geben / wie der
Schecher

Schecher am Creutz / zur rechten Hand / oder ein Dieb am Galgen / da müssen wir es ins Vater vnser schlagen / vnd sprechen: Dimitte nobis debita nostra. Aber wir reden itzt von denen / die Remasle partam / noch besitzen vnd haben / die können nicht Busse thun / sie geben es denn wider / wie Zacheus thut.

Darumb ist dieses Euangelium ein schön Euangelium / Docet enim totam poenitentiam, cum fructibus eius. Denn es leret die gantze vollkomene Busse / mit iren fruchten / Wie Johannes der Teuffer / Christus vnd Paulus / geleret haben / denen wir billich sollen nachfolgen / vnd so thun / wie Zacheus gethan hat / wollen wir anders rechte Christen sein / denn solchs ist NOTIG. Derhalben gehe nu ein iglicher in sein hertz / vnd sehe vnd erforsche das / Ob er auch Zacheus sey / oder nicht / das ist / ob er auch so willich rew vnd busse thue / vnd abstehe von sünden / wie er gethan hat. Dar nach ob er auch / so ein hertzlich verlangen vnd begirde habe nach Christo / Vnd wenn dich der / durch sein Wort beruffet / das du balde gehorsam seiest / hörest das / vnd glenbest dem von hertzen / Dar nach gibstu gerne den armen / vnd hastu böse gewunnen gut bey dir / das wiltu gerne wider geben / wie Gott geboten hat / denn das ist nötig / Ist dein hertze also ? So bistu gewis ein rechter Zacheus / vnd ein guter Kirchmesman oder Gast. Als denn dancke Gott darumb / vnd bitte / er wolt dich in dem gnediglich erhalten / vnd helffen durch seinen heiligen Geist / das du nicht möchtest ablassen / lass
oder

oder müde werden / sondern fortfaren / vnd teglich
in dem zunemen.

Is dein hertze aber nicht also / sondern es
bleibet in Sünden / hat lust vnd freude zu sündi-
gen / wil nicht büßen / Noth vnd leid haben / ab-
stehen von sünden / veracht Christum vnd sein lie-
bes Wort / wil das nicht hören vnd glauben / wenn
es geprediget wird / wil den armen nichts geben /
Raubet / vnd ziehet noch teglich dem Nächsten
das seine mit betrug abe / vnd wilt ein Libertiner /
oder ein Antinomier sein / sagen / Gute werck sein
nicht NOTIG / sondern sein frey / frey / so bistu kein
Zacheus / oder kein Kirchmesgast / sondern des
Teuffels gast / des gefallen du lebest / So magstu
wol heute in die Kirche gehen / zu Gott schreien
vnd ruffen: O lieber Gott / ich höre wie Zache-
us Kirchmes gehalten / vnd was er gethan hat /
aber so bin ich nicht / Ich bitte aber / gib mir dei-
nen heiligen Geist / der mir mein hertz erweiche /
das ich mag werden / wie er gewesen ist. Bittestu
so / so wil dir Gott den heiligen Geist geben / vnd
helffen das du so werdest / wie Zacheus gewesen
ist / Wie Christus spricht / Luc. II. Petentibus dabi-
tur Spiritus sanctus. Denn dieses Exempel Zachei /
wird nicht den Kühen vnd Ochsen fürgeschrie-
ben / sondern vns Menschen / dem nach zu folgen.
Wiltu aber nicht bitten / so wirstu wol one Busse
bleiben / in Sünden sterben vnd verderben. Das
wir aber also bitten / dazu helffe vns Gott der
Vater / vnd der Son / vnd der heilige
Geist in ewigkeit / Amen.

D

Neemig

Neēmīæ viij. cap.

Ite domum, comedite pinguia, & bibite
mulsum, & mittite partem his, qui non præpa-
rauerunt sibi, quia sanctus dies D O M I N I est,
& nolite contristari.

Im Neundten Teil D. Martini Luthers/
zu Wittemberg gedrucket / am 535.
Blat stehet also.

S. Augustinus.

Die sünde wird nicht vergeben/es werde
denn widerstattet/was entwendet ist.

Wo nu Menschengüter entwendet sind/
da zweiuelt die Welt gar nichts / man solle
vnd müsse es widerstatten/wie das alle Rech-
te weisen vnd leren. Dieses ist der Oberkeit
vnd Juristen ampt zurichten vnd zuuolbrin-
gen.


Hie ist kein Mensch so gering (der nicht
toll vnd töricht ist) er helts dafür / es sey bil-
lich vnd recht/das einem jeden das seine ent-
wandt/wider erstattet werde. Vnd ist der-
halben die Welt vol haders vnd jammers / wie
man teglich sihet.

Aber

Aber ob man Gott solle oder müsse / auch
seine entwandte Güter widerstatten / da sor-
get niemand vmb. Wiewol ers hefftig suchet/
foddert / dreyet / zürnet / dazu auch greifflich
strafft vnd plaget / damit er das seine wider
hole vnd friege. Dennoch fraget die Welt
nichts darnach. Hæc ille.

Actorum 26. stehet also
geschrieben.

Paulus verkündiget denen zu Dama-
sco vnd zu Jerusalem / vnd in alle gegend Jü-
disches lands / auch den Heiden / das sie Bus-
setheten / vnd sich bekereten zu Gott / vnd the-
ten recht schaffene werck der Busse. Da haben
wir drey stücke der Busse / die ein iglicher Christli-
cher Lerer predigen sol / wil er anders S. Paulo
nachfolgen mit leren.




AK 7. 2905

Faint, illegible text, possibly bleed-through from the reverse side of the page.

Christoph 2. 1681

Faint, illegible text, possibly bleed-through from the reverse side of the page.



M.C.




ULB Halle
003 485 773

3







B.I.G.

Black
3/Color
White
Magenta
Red
Yellow
Green
Cyan
Blue

Farbkarte #13

II i
2905

mon auff

ber das Euangeli-
. Darinnen gehandelt
OTIGE stücke der
hen Busse/Ge-
durch

ichholzerum
Berlin.

chen vnd Chur-
Drenklaw in der
Druck ver-
t.

berg.

ch Lorenz
ick.

2.
THECA
AVIANA

UNIVERSITÄTS-BIBLIOTHEK
HALLE
(SAALE)